



SIARAN MEDIA

KANSER SERVIKS CATAT PENURUNAN KADAR INSIDEN

KUCHING, 27 JAN – Kementerian Pembangunan Wanita, Keluarga dan Masyarakat (KPWKM) melalui Lembaga Penduduk dan Pembangunan Keluarga Negara (LPPKN) terus mempergiat usaha untuk meningkatkan kesedaran betapa pentingnya pencegahan dan rawatan kanser serviks melalui pelaksanaan Sambutan Bulan Kesedaran Kanser Serviks Kebangsaan 2025 yang berlangsung di Dewan Santubong, *CIDB Convention Centre* di sini.

Berdasarkan laporan terbaru *Summary of Malaysia National Cancer Registry Report* memperlihatkan kadar penurunan insiden kanser serviks di Malaysia. Pada tahun 2017 hingga 2021, kanser serviks berada pada tempat keenam (6) tertinggi dalam kalangan wanita di Malaysia berbanding dengan laporan pada 2012 hingga 2016 dimana kanser serviks merupakan kanser ketiga tertinggi dalam kalangan wanita di Malaysia. Bagi kanser dalam kalangan wanita hanya kanser serviks sahaja yang mencatatkan penurunan kadar insiden kanser. Ini jelas menunjukkan kanser serviks merupakan satu-satunya kanser yang boleh di cegah dengan langkah pencegahan yang tepat.

“Tinjauan Kebangsaan Kesihatan dan Morbiditi (NHMS) 2023 mendapati 65 peratus (%) wanita berumur dua puluh (20) tahun dan ke atas tidak menjalani saringan kanser serviks dalam tempoh tiga (3) tahun yang lalu. Menyedari akan kepentingan penjagaan kesihatan golongan wanita, Kerajaan telah meluluskan peruntukan sebanyak RM13.5 juta kepada LPPKN untuk melaksanakan saringan kanser serviks dan kanser payudara. Dengan peruntukan ini, kita berharap agar saringan ini dapat memberi manfaat kepada 67,000 wanita di seluruh negara pada tahun 2025, sekaligus membantu dalam usaha pencegahan dan pengesanan awal kanser,” demikian menurut YB Dato’ Sri Hajah Nancy Shukri, Menteri Pembangunan Wanita, Keluarga dan Masyarakat dalam ucapan perasmian beliau.

YB Dato' Sri Hajah Nancy Shukri turut menyatakan “berdasarkan laporan Daftar Kanser Kebangsaan Malaysia 2012 hingga 2016 oleh Kementerian Kesihatan Malaysia (KKM), tiga (3) negeri yang merekodkan kadar insiden kanser serviks tertinggi adalah Sarawak, Sabah dan Perlis. Kementerian melalui LPPKN akan memberikan tumpuan khusus akan diberikan kepada negeri-negeri yang mempunyai kadar insiden kanser serviks yang tinggi.”

LPPKN juga akan menumpukan saringan awal kanser serviks mengikut lokaliti sebagai langkah mencapai eliminasi kanser serviks di mana semua wanita dalam lokaliti tersebut disaring. Bagi tujuan ini, Kampung Santubong, Kuching telah dipilih sebagai lokaliti pertama di Sarawak dan dianggarkan dalam tempoh 2 tahun, semua wanita layak di Kampung Santubong dapat disaring.

Sambutan Bulan Kesedaran Kanser Serviks Kebangsaan 2025 tahun ini turut dimeriahkan dengan satu sesi sembang santai bertajuk "*Know It To Beat It!: Be Cervical Cancer Aware*" melalui perkongsian oleh Doktor Perubatan LPPKN, Pakar Perubatan jemputan, serta bekas pesakit kanser. Selain itu, satu persembahan sketsa "*Support of Men*" turut dipersembahkan untuk menekankan peranan penting lelaki dan ahli keluarga dalam memastikan wanita menjalani saringan kesihatan.

Turut hadir pada majlis ialah YBhg. Dato Sri Rohani Abdul Karim, Pengerusi LPPKN, YBrs. Tuan Haji Abdul Shukur Abdullah, Ketua Pengarah LPPKN, pegawai-pegawai kanan Kementerian, Jabatan dan Agensi KPWK M.

####

**UNIT KOMUNIKASI KORPORAT
KEMENTERIAN PEMBANGUNAN WANITA, KELUARGA DAN MASYARAKAT
27 JANUARI 2025**